

道光丙戌仲春鐫

籌濟編

詒研齋藏版

序

友楊君靜閑曩官比部著有式敬編治獄者久已奉爲圭
臬上年冬乞假歸省又以救荒一書向尠善本蒐羅史籍會
羣排比得三十二卷名曰籌濟編予惟宋司馬康之言曰自
古聖賢之君非無水旱惟有以待之則不爲甚害蓋救之於
旣荒之後不如備之於未荒之前周禮十二政尙已自漢以
來勤求上理代有循良農桑水利之經蠲緩振貸之制積貯
歛散之規良法美意備載前史學古入官者慮無不以民事
爲兢兢顧或簿書鞅掌無暇勤求不幸而遇偏災張皇補苴

以救目前卽有毅然敢爲樂以一身救百姓而行之未得其
宜卒至百弊叢生而實惠未逮始悔講求之不早晚矣東坡
贈劉正叔詩云平生學問只流俗衆裏笙竽誰比數忽令獨
奏鳳將雛倉猝欲吹那得譜誠能講求於平日取用於臨時

仰體

聖天子視民如傷之心下慰吾民慈父母之望設誠而致行之則
是編固卽牧民之譜也夫

道光六年歲在丙戌孟夏之月愚弟潘世恩識

籌濟編序

粵若虞廷之命五臣也首以黎民阻飢爲慮而敷教明刑皆
後之誠以民飢則亂之源無以爲生而不樂生自知必死而
不畏死教無可施刑無可怵是以聖人治天下必先救民飢
以制治於未亂也惟命稷布穀祇豫謀乎八口之無飢而臨
事救飢之策未備焉蓋荒政至周禮而始詳也自漢以還卹
災匡乏見於典籍者善政徽言班班可考我

朝

聖

聖相承敬

天勤民綏豐屢告偶遇偏災

德洋

恩普物靡不得其所

皇上紹隆

前緒

怙冒埶埏道光三年癸未直隸江蘇等省被水壘沛

德音賑卹蠲緩補救多方不惜數百萬帑金以蘇民困又興水利

慎倉儲善後之圖靡不詳盡

知周乎萬物而

道濟天下固宜有荒歲無荒民沐浴

膏澤皦皦如也

景仁

奉職秋曹於是冬乞假歸省慈闈適值梓鄉

查辦災賑與二三同志講求利病因於晨昏之暇旁搜古今
救荒諸書分條採輯彙而存之夫事不監古無由廣見聞增
識力也而不驗之當今之務亦無以審時勢之宜而通其變
然則酌古準今觀其會通庶幾臻於美善乎伏思荒政條件
浩繁而提其綱詳其目數大端足以盡之謹登蠲卹

功令於卷首崇憲典昭法守也發端列濟荒總論舉宏綱撮機

要也先報災達下情去壅蔽也次救災急當務拯艱危也次勘災核虛實也次審戶防遺濫也次發賑卹災之正事措注必周也次煮賑療飢於當阨接濟孔殷也次平糶次通商劑盈虛招懋遷也次勸輸次任卹誘好施切同患也次借貸給牛種計代匱也次興工侍畚揭就傭直也次議蠲豁額賦孚惠心也次議緩息追呼紓民力也次輯流移憐蕩析免道殣也次視存亡憫號寒悲瘡天也次保幼收棄孩謀生聚也次戢暴鋤強悍靖囂陵也此濟荒之大略也有與災祲若不相涉而適相感者省愆以格幽則禱神次之拔冤以宣滯則理

刑次之復有與旱潦迭相因而豫相制者毗於旱而害稼者殄則除蝗次之毗於水而殃民者殲則伐蛟次之又次曰撫瘡痍凋瘵初平亟培養也又次曰尚淳樸浮靡是懲端習俗也允若茲荒政具舉矣然徒法不能以自行擇人而使資經畫也任賢能次之按籍而稽杜侵冒也嚴保甲次之若乃災未至而策於事先災已弭而防於事後曰修水利以時蓄洩曰勸農功以課耕穫曰裕倉儲以待歛散此有備無患之永圖也而又有協濟之權策以備雜糧終之虞艱食充枵腹也未附救火一條由救荒推類及之憫焚如全生命也各條事

實格言俱按時代編次

國朝則就所見名臣之嘉謨碩儒之篤論分類排纂而其政蹟不詳懼有掛漏也前弁以短引探源經義後繫以按語竊抒臆見以究指歸而於

當代之章程所爲因時損益以布諸實政者每條依次綴緝用誌梗概敬述

列聖諭旨俾司牧者得所折衷益穆然於

聖天子紹

聞衣

德言視民如傷之至意若合符節也夫堯水湯旱雖盛世不能無荒而唐之民作息相忘商之民室家相慶惟堯湯如天之仁大德之懋有以補天地之缺憾而釐工熙績守典承休亦賴百官修輔焉程子曰一命之士苟存心愛物於人必有所濟景仁不揣樛昧輯成是編曷敢云有濟也亦籌其可濟云爾世有康濟爲懷曲垂省覽加之裁擇於以軫民瘼布

參攷古與今之典兼權時與地之宜釐奸剔弊設誠於內而致行之實政務矢以實心治人不虛夫治法安見苦匏之供不足佐舟楫之用也哉

道光四年甲申季冬立春日常熟楊景仁自序

一荒政務期實惠及民。憶乾隆乙巳吾邑被旱，辛亥被水。

先君子爲當事，敦請襄辦賑務，平糶勸輸，以身率先，悉心經畫，閭里晏如。嘗訓景仁曰：辦荒當求古人成法，而運用

之妙，存乎一心。要在隨地制宜，達此滿腔惻隱，則造福不淺耳。今茲哀集成編，猶先志也。覽者一片實心，流貫於法之中，自能神明於法之外。

一是編於癸未夏秋之交，便擬纂輯。時景仁寓京師宣武門

內東帖象胡同，司讞西曹，案牘填委，偶得暇晷，卽流覽古今濟荒成績，銓兒簪筆稍閒，侍襄搜討，適同里龐子方學

正太塋

下榻槐雲書屋屬其先爲分類摘鈔是冬

景仁

請假

歸里定省之餘廣加採擷向葛林一茂才

桂森

處借觀全史

究委尋源折衷一是命兒姪輩更番謄寫復倩及門暨世

講同志者相助繕錄初藁甫脫與內弟陶靜涵孝廉

貴鑑往

復商榷旋寄郡城質諸潘芝軒尙書

世恩

又酌定數處愆愆

付刊竊惟此書之成幾經釐訂良友是正之盛心並識之

以矢勿諉云

一前事不忘後事之師

景仁

學識淺陋自起草薇垣讀律雲

署職守所羈未遑研究經濟諸書茲編徵引難免闕漏惟

區區實事求是之誠。藉剗剔以省鈔錄。尙祈
名卿碩彥
俯加糾正。則一得之愚。或亦可備採擇云爾。

籌濟編凡例

一 濟人之事。救荒祇其一端。而一端可見全體。如賢能保甲。水利農功等項。不專於救荒。而皆與荒政相維繫。景仁於辛巳歲輯式敬編。以治獄關乎生人之命也。而辦荒亦生命所關。因復纂是編。名曰籌濟。夫盈不忘虧。豐必慮歉。雖處豐亨之會。宜防饑饉之辰。亦惟綜良法以計生全已矣。

一是編卷首謹載蠲卹

功令。從會典及戶部則例與刑部律例內錄出。以定遵循。總論揭其綱目。自報災至尙淳樸。括乎濟荒之始終條理。禱神

理刑感於無形除蝗伐蛟過於旣兆任賢能嚴保甲以清其源修水利勸農功裕倉儲以豫於先而維於後備雜糧以盡其餘救火以推其類

一每條前引語推闡事所由始義必宗經蓋後世良法往往本於三代也周官禮記注疏淵源最古是以徵引不厭其繁至事實則皆根據子史不復以經訓相雜所採漢書詞頗質奧間存唐顏師古等原註俾易詮解三國志係宋裴松之註事有附見註中者一例摭摭俱詞足以指實

一前言往行自夏商以迄勝國按代編入

國朝祇述名臣哲士之議論規條未載事實小註及按語中偶引一二事以作印證。

一當世名公卿之善政著有成書未得徧覽謹就所見採入數條殊未該備俟續有見聞當另編補載。

一所引故實緒言俱中正無偏平近易行者亦有所議可行而中有一二語易滋流弊卽於原文內酌從刪節其有政雖卓而不可爲典要論雖高而不協於時宜均未採入聞有於注中引及者略綴數語以明取舍。

一各條下鄙見閒有發明用雙行注加按字。